

# COMUNU DE UDA

## Tzitadi Metropolitana de Casteddu

### REGULAMENTU BIBLIOTECA COMUNALI

Aprovau cun delibera de C.C. n. 42 de su 28/10/2014

#### CABU I

#### FINALIDADI DE SA BIBLIOTECA

##### ART. 1

Sa Biblioteca Comunali de Uda, in su cuntestu de is atividadis suas de servìtziu pùbbricu, est un'istitudu culturali chi tenit su còmputu de lompi a totus is tzitadinus cun s'informatzioni culturali e sa ligidura pùbbrica, cun sa tenta de ndi sciusciai unu de is barrancus (sa disaigualidadi de istrutzioni e de cultura) chi limitant s'agualidadi e sa libertadi de is tzitadinus (art. 3, comma 2 de sa Costitutzioni).

Po lompi a custa tenta cun critèrius de imparzialidadi e in s'arrespetu de is parris diferentis agiudat a promovi sa spainadura prus ampra de s'informatzioni bibliogràfica e s'aprofundamentu de sa dibata culturali, e puru a sustenni is esigèntzias de informatzioni, de stùdiu, de circa, de formatzioni culturali e de imperu de su tempus liberu de is tzitadinus. Issa allogat cun dònna cura e cun òrdini totus is librus chi tenit, aciungit e ammànniat is arregortas suas specifìcas e atras prus generalis, spainendi sa connoscièntzia po mesu de ainas oportunas e promovendi totus is iniziativas culturalis chi serbint a custa tenta. Cura particulari si donat a achiriri, arregolli, allogai, gosai e avalorai is òperas chi pertocant a sa stòria e sa vida culturali de sa Sardigna. Sa pròpia atenzioni si donat po fai nasci e afortiai in is giòvonus sa passioni a sa ligidura giai de is primus annus de vida e a promovi sa ligidura po is piciocheddus e is mannus.

##### ART. 2

Giai ca est una Biblioteca de cultura generali at a trabballai po aggiornai sempri su fundu stòricu-literàriu-umanìsticu; at a ammànniai su nùmeru de òperas chi pertocant a is scièntzias sotzialis e tènicu-scientifìcas; at a ponni impari òperas de ampra spainadura e chi pertocant is punnas culturalis contemporàneas.

##### ART. 3

Po mori de is tentas specifìcas chi tenit, sa Biblioteca, cun sa Setzioni Sardigna, at a tenni a coru s'aggiornamentu bibliogràficu de materiali chi riguardat argumentus localis e de sa Regioni Sarda.

#### **ART. 4**

Sa Biblioteca, po mesu de is duas àreas, Setzioni Piciocheddus e Setzioni Mannus, at a fai atividadi de spainamentu e promotzioni de sa ligidura po s'infàntzia e po is piciocheddus, donendi stìmulus culturalis e educativus; at a partecipai a progetus impari a is atras agentzias educativas e culturalis chi s'agatant in su territòriu. At a donai a is babbus e a is mammas, a is maistus e a is educadoris sa consulèntzia sua apitzus de su materiali bibliogràficu e multimediali chi ddoi est e chi connoscat. At a ativai inìtziativas, amostas, dibatimentus e cunvegnus cun sa tenta de promovi, sustenni e spainai sa cultura po s'infàntzia e sa gioventudi trabballendi fintzas cun is òrganus cumpetentis de sa scola e cun is rapresentantis de is assòtzius e de voluntariau sòtziu-culturali.

### **CABU II**

#### **BENIS**

#### **ART. 5**

De su patrimoniu de sa Biblioteca Comunali faint parti:

- Librus e documentus chi ddoi fiant in s'arregorta de sa Biblioteca Comunali candu s'est emanau custu Regulamentu, chi funt comporaus o arregalaus, e registraus regularmenti in inventàrius digitalis e de paperi apòsitus, chi faint parti de su fondu comunali de Uda;
- Catàlogus, inventàrius e databasi chi pertocant a is arregortas de sa Biblioteca;
- Atretzaduras multimedialis, materialis e arredus in frunidura a sa Biblioteca;
- Eventualis immòbilis destinaus a strangiai is struturas operativas de sa Biblioteca.

#### **ART. 6**

Dònna annu s'at a depi predisponni unu quadru de su pianu programmàtigu a su scopu de sa formatzioni de su bilànciu preventivu, in cuncordu cun is necessidadis de sa tzitadinàntzia. In custu s'ant a indicai is servìtzius e is inìtziativas chi s'Amministratzioni Comunali afidat a sa Biblioteca, cumentis a is atividadis ordinàrias, promotzioni culturali e progetus specialis; is resorsas chi serbint a sodigai custus obietivus, is ainas de averiguamentu de is arresurtaus.

#### **ART. 7**

Intra de su 30 de Abrili de s'annu infatu, s'at a depi cumpilai sa relatzioni consuntiva de sa gestioni acabada, ammostai su gradu de otenimentu de is obietivus prefissaus, aprontada po permiti de cuntrollai sa gestioni apitzus de s'atividadi de sa Biblioteca de parti de sa Giunta Comunali.

### **CABU III**

## ORGANIZAZIONI INTERNA

### ART. 8

Is localis de sa biblioteca s'agatant in bia Argiolas Mannas e funt pratzius in is àreas funtzionalis afatantis:

- Emeroteca;
- Logu po sa ligidura;
- Consultazioni;
- Aposentu po studia;
- Aposentu po is cunferèntzias;
- Postazioni po intrai in internet.

In foras de is localis destinaus a sa Biblioteca ant a essi apicaus: oràrius chi est oberta, insigna, cascitedda po sa posta.

### ART. 9

Sa Biblioteca Comunali de Uda est pratzia in tres Setzions principalis:

1. Sardigna;
2. Mannus
3. Piciocheddus.

### ART. 10

S'amparu e s'allogadura de totus is librus, de sa mobilia e de is atrezaduras chi ddoi funt in sa Biblioteca funt a càrrigu, chi sa gestioni est donada a atrus, de su sugetu afidatàriu, chi organizat su trabballu de ordinamentu, catalogazioni e allogadura de su materiali promovendi a su matessi tempus su imperu de su materiali etotu, siat po mesu de is servìtzios normalis de ligidura e de prètidu, siat organizendi servìtzios de informatzioni e ghia a sa ligidura.

### ART. 11

Totus is volumus de is òperas imprentadas e scritas a manu, totus is librixeddus chi gia esistint e is achirimentus nous de sa Biblioteca, depint portai in su frontispìtziu e in su versu unu timbru cun su nòmmini de sa Biblioteca. Custu si depit torrai a ponni in sa pag. 9 e in s'ùrtima pàgina de su volumu. In prus ant a depi portai su nùmeru progressivu e èssiri annotaus in su registru cronològicu de intrada. Custu nùmeru progressivu at a essi indicau in s'eticheta posta in s'ùrtima pàgina, acanta de su timbru.

### ART. 12

Sa Biblioteca at a depi tenni:

- a) Un'inventàriu general; b) unu catàlogu digital alfabèticu po autori; c) unu registru cronològicu de intrada; d) unu registru de is òperas chi iat a bolli su pùbbricu; e) unu registru de is atividadis fatas in sedi; f) unu registru de su servìtziu ìnternet; g) unu registru prètidus.

### **ART. 13**

Is catàlogus bècius, is elencus, is registrus e is inventàrius chi no si imperant, e is elencus e is catàlogus partzialis chi acumpàngiant is colletzioni interas comporadas, si depint allogai po ndi permiti sa consultazioni. Chi si format una collezioni de materiali àudiu-visiva o de periòdicus, s'at a depi adotai po issus puru unu inventàriu topogràficu o sinnaduras sceti po issus.

## **CABU IV**

### **SERVÌTZIU A SU PÙBBRICU DE SA BIBLIOTECA**

### **ART. 14**

Su personali chi trabballat in is servìtzius depit fai in modu chi si lompat liberamenti a is documentus, e depit agiudai is umperadoris in is circas insoru cun disponibilitadi e garbosidadi. Candu est in servìtziu su personali si depit ponni unu cartellinu de connoscimentu; in is comunicatzioni de persona o po telèfunu si depit presentai sempri cun su nòmìni e sangunau suu.

### **ART.15**

S'Amministratzioni Comunali detzidit s'oràriu de dònna di e is diis de sa cida chi est oberta sa Biblioteca. Is oràrius chi est oberta tenint contu de candu is umperadoris ddoi intrant de prus po imperai is servìtzius.

### **ART. 16**

S'intrada a Biblioteca est libera e no si depit pagai nudda. In is logus po sa ligidura si podit andai a studiai cun materiali pròpiu a segunda de is esigèntzias de su servìtziu de consultazioni e ligidura. Si podit intrai a Biblioteca e gosai de is servìtzius donaus sempri in s'arrespetu de is atrus e de su patrimoniu. Chinisiat fetzat dannus a sa sedi o a su patrimoniu de sa Biblioteca est obbrigau a ddus remborsai.

A totus is umperadoris no est permìtiu:

- A fumai in totus is aposentus de sa Biblioteca;
- De fai sinnalis o scriri in is librus de sa Biblioteca o in cussus pigaus a prètidu cun su servìtziu interbibliotecàriu;
- De fai sinnalis o scriri o fai dannus in is localis, a sa mobìlia e a sa strumentazioni de sa Biblioteca;

- A tenni calisiat cumportamentu contràriu a is normas de su bivì tzivili.

#### **ART. 17**

Sa Biblioteca Comunali de Uda donat a su pùbbricu is servìtzius afatantis:

- Servìtziu de informatzioni;
- Servìtziu de ligidura e consultatzioni in sedi;
- Servìtziu de prètidu a domu;
- Servìtziu de consultatzioni cd-rom, bancas datus e Ìnternet;
- Servìtziu de promovidura a sa ligidura.

#### **ART. 18**

Sa consultatzioni de is documentus chi tenit sa Biblioteca e de is catàlogus, s'informatzioni a su pùbbricu e sa consulèntzia bibliogràfica (tenta po mesu de is resorsas de sa biblioteca o disponìbilis po de badas) funt liberas e no si depint pagai. Su Personali in servìtziu agiudat a su ligidori in is circas suas cun òpera de consulèntzia fitiana, discreta e cualificada.

#### **ART. 19**

Is documentus donaus a prètidu si depint registrai in su "registru prètidus" apòsitu e fendi ponni sa frimma. Chi calincunu donat generalidadis frassas no at a podi gosai prus de is servìtzius donaus de sa Biblioteca. Cumentis a règula generali no si podint prestai in domu prus de cuatru documentus. Candu su libru est torrau, su impiegau fait ponni un'atra frimma acanta de su fueddu "TORRAU" e acanta de sa data chi est torrau. No ddoi at ligidori perunu chi est dispensau de cumpilai su registru. No si podint donai po ligi librus chi no siant giai timbraus e inventariaus. In nisciuna ocasioni is ligidoris podint lompi a is scafalis chi no funt obertus a su pùbbricu po sa consultatzioni.

#### **ART. 20**

Funt ammìtius a is servìtzius chi abbisòngiant de s'iscritzioni a sa biblioteca totus is tzitadinus italianus e stràngius chi ammostint unu documentu de identidadi bàlidu (carta de identidadi, passaportu, permissu de residèntzia, etz.). S'iscritzioni est a tempu indeterminau e no si pagat. Po is prus piticus de 16 annus tocat a fai frimmai s'iscritzioni de su babbu o sa mamma o de chini po issus po su prètidu bibliotecàriu. Po is prus piticus de 18 annus chi bolint imperai Ìnternet serbit s'autorizzazioni de su babbu o sa mamma o de chini po issus.

Is datus personalis de is umperadoris ant a èssiri amparaus e imperaus sceti po gosai de is servìtzius de sa Biblioteca.

Is circas in is catàlogus normalmenti ddas fait su ligidori, ma po acramentus e consillus apitzus de cumentis circai, su ligidori podit domandai agiudu a su personali specializau chi ddoi est in Biblioteca.

## **ART. 21**

Est proibiu a fai sinnalis e a scriri in is òperas imprentadas o scritas a manu de sa Biblioteca, fintzas po curregi calincunu sbàlliu mannu de s'autori o calincuna faddina de stampa. S'assistenti de sala est responsàbili de fai arrespetai custas normas e de sa cautella de consultazioni.

## **ART. 22**

Perunu ligidori podit bessiri de s'aposentu chentza de ai torrau innantis is òperas chi si podint consultai sceti, chi si depint lassai un d-unu carrellu apòsitu. Si podint pigai o torrai is librus fintzas a unu quartu de ora innantis chi sa Biblioteca serrat.

## **ART. 23**

Is ligidoris depint abarrai citius e depint tenni cumportamentu decorosu, e tenni su màssimu arrespetu candu consultant is catàlogus o imperant is documentus arricius.

## **ART. 24**

Su richiedenti est responsàbili de is mancàntzias e de is dannus chi nci podint essi a su momentu chi is prèstidus si torrant, chi no si funt sinnalaus a su bibliotecàriu in su momentu chi si funt pigaus.

## **ART. 25**

Chinisiat fetzat dannus o guastus mancai chentza de crupa a s'òpera pigada a prèstidu, dd'at a depi cambiai cun d-una còpia noa de sa pròpia editzioni, o pagai in dinai su valori suu, foras de su remborsu po dannus prus mannus.

## **ART. 26**

Chini tenint a prèstidu librus de sa Biblioteca e càmbiat domu anca bivit ddu depit comunicai luegus a sa Biblioteca etotu.

## **ART. 27**

Su prèstidu de un'òpera est de trinta diis a su màssimu, a cumintzai de sa dì chi su richiedenti dda domandat. Sa Biblioteca podit decidi de incruzai custu tempus a segunda de is esigèntzias de su servìtziu pùbblicu e de domandai de dda torrai luegus innantis de sa data chi scadit su prèstidu.

## **ART. 28**

Chi s'òpera pigada a imprèstidu no est torrada aintru de su tempus stabiliu, pustis de duus avisus de còidu, su primu aintru de is 30 diis e su segundu aintru de 60 diis de sa dì de su prèstidu, s'umperadori est suspèndiu po unu certu tempus de su pigai atras òperas fintzas a candu no ndi torrat is documentus scadius o fintzas a candu no ddus càmbiat cun d-una còpia oguali, o chi ddoi funt dannus, fintzas a su remborsu de su dannu.

## **ART. 29**

Is umperadoris podint fai propositas a s'Amministratzioni Comunali po ammellorai is prestatzionis de sa Biblioteca. In prus podint proponni de pigai materiali documentàriu ponendi is indicatzionis in su registru apòsitu postu in Biblioteca.

### **CABU V**

#### **PROTZEDURA PO LASSAI IS LOCALIS DE SA BIBLIOTECA A ENTIS E ASSÒTZIUS CANDU NCI FUNT MANIFESTATZIONIS CULTURALIS**

## **ART. 30**

Is localis de sa Biblioteca Comunali de Uda chi no funt imperaus po allogai materiali libràriu, e chi funt imperaus cumentis a logu po spartziri e po ligi, in s'arrispetu de sa normativa in vigèntzia e innantis de ai otentu autorizatzioni de s'Enti, si podint imperai po:

- a) Cunferèntzias culturalis;
- b) Ligiduras de testus teatralis;
- c) Presentatzioni de librus;
- d) Proietzioni de documentus scientificus e film "a passu redùsiu";
- e) Amostas bibliogràficas;
- f) Amostas fotogràficas, artìsticas, documentàrias e de atru caràtiri culturali;
- g) Atras initziativas culturalis.

Mai is localis si podint donai in cuncessioni po imperus chi no funt cumpatìbilis cun is finalidadis de sa Biblioteca.

### **CABU VI**

#### **PROTZEDURAS PO ACETAI DEPÒSITUS, DONATZIONIS E LEGAUS**

## **ART. 31**

Volumus, librixeddus, documentus e giornalis lassaus in arregalu a sa biblioteca cumentis podint essi puru is còpias de is librus lassadas in arregalu de is autoris o editoris, funt acetaus cun àutu formali de sa Giunta Comunali, pustis chi su bibliotecàriu at fatu una relatzioni tècnica.

## **CABU VII**

### **SCARTUS, INVENTÀRIU**

#### **ART. 32**

Sa Biblioteca Comunali depit fai dònna annu, paris cun is opertzionis de inventariau, is elencus de is àutus chi cunsiderat inùtilis a ddus allogai ancora. Custus elencus si depint fai in tres còpias e ant a depi indicai esatamenti su tipu de is documentus chi funt e cantu funt. Po is scartus s'at a fai s'àutu deliberativu chi serbit, e a custu si depit alliongai s'elencu descritivu de is paperis chi si depint fai foras; apitzus de donniunu si depit ponni su timbru chi specificat sa destinazioni finali, chi est fuliau o arregalau (a sugetus pùbbricus o privaus).

#### **ART. 33**

Aintru de su 31 de Gennaxu de dònna annu s'at a depi fai unu cuntrollu de totu su materiali chi ddoi est in sa Biblioteca comunali po cumpilai s'inventàriu.